

四庫全書

史部

欽定四庫全書

欽定八旗通志卷一百八十九

人物志六十九

大臣傳五十五

漢軍鑲黃旗一
威 張大猷

馬光輝 范文程

丁文 張文衡

劉之源 胡有陞

楊名高

郭廷佐

趙廷臣

高天爵

范文程

范文程瀋陽人曾祖總明嘉靖時官兵部尚書祖
沉瀋陽衛指揮同知父楠未仕文程少好讀書穎

敏沉毅與兄文案並為生員天命三年大兵克撫
順文程年二十有一

太祖高皇帝見而罷之

名與語知其熟於當世之務使隨行及取遼陽度三岔攻
西平下廣寧皆叅謀帷幄天聰三年以文館官從

太宗文皇帝伐明入薊門克遵化招服潘家口馬蘭峪三
屯營馬欄關大安口五城會我師在大安為敵所
圍文程以火器進攻圍解

太宗自將臨永平令守遵化敵兵掩至文程率先力戰敵
敗走論功授三等輕車都尉世職五年八月師圍
大凌河城文程招降西山一臺

命即統其衆六年六月

太宗詢廷臣伐明之策文程與寧完我等言我軍如欲深
入當乘其無備直抵北京訊其和否毀山海關水
門而歸以壯軍威計所從入惟雁門關為便並論
沿路軍民俟版圖歸我酌免賦稅示愛養意

太宗嘉納之崇德元年五月授秘書院大學士初八旗置都統衆議首推文程

太宗曰此職一軍耳朕方資為心膂其別議之時文程所領皆樞密事每入對必漏下數十刻始出或未及食息復奉

召入凡

宣諭各國勅書率撰擬以進至是改文館為內三院遂有是

命八年八月

世祖章皇帝嗣位

命以其族屬隸鑲黃旗順治元年睿親王多爾袞將統兵

伐明文程上議曰迺者明之流寇煽亂其君若臣

不能相保雖天數使然良由我

先皇帝憂勤肇造諸王大臣夾輔

冲主忠格蒼穹

上帝潛為啟佑也竊惟承丕業以垂休萬禩者此時失機

會而貽悔將來者亦此時何以言之中原荼苦已極黔首無依思歸令主以圖樂業明之受病已不可治其土地人民不患不得患得而不為我有耳曩者棄遵化屠永平一再深入而返彼以我為無大志縱來歸附未必撫卹因懷攜貳今日有已服者有未服宜撫者是當申嚴紀律秋毫勿犯復宣諭以昔日不守內地之由及今進取中原之意官仍其職民復其業錄賢能恤無告大河以北可傳

檄而定也此行或直趨北京或相機攻取必於山海長城以西擇一堅城頓兵而守以為門戶惟諸王察之大軍遂發文程從師渡遼河明山海關總兵吳三桂以闖賊陷北京來乞師文程曰自闖寇猖狂中原塗炭近且傾覆京師朕厥君后此必討之賊也我

國家上下同心兵甲選練誠聲罪以臨之恤其士夫拯厥黎庶兵以義動何功不成乎復言好生者天

之德也兵者聖人不得已而用之自古未有嗜殺
而得天下者

國家欲統一區夏非又安百姓不可於是申嚴紀律
妄殺者有罪既敗流賊二十萬於山海關我兵長
驅而西民多逃匿文程草檄宣諭曰義兵之來為
爾等復君父仇所誅者惟闖賊師律素嚴必不汝
害民心遂安師入北京建議備禮葬明崇禎帝時
宮闕灰燼百度廢弛文程收集諸曹冊籍布文告

給軍需事無巨細咸與議焉明季賦額屢增藉皆
燬於寇惟萬厯時故籍存或欲於直省求新冊文
程不可曰即此為額猶恐病民豈可更求哉自是
天下田賦悉照萬厯年間則例徵收除天啟崇禎
時諸加派民獲蘇息二年正月叙功晉三等男十
月江南既平上疏言治天下在得民心士為秀民
士心得則民心得矣宜廣其途以蒐之請於丙戌
會試後八月再行鄉試丁亥二月再行會試從之

三年四年兩充會試主考官五年十一月晉一等

男

賜巴克什號六年正月充纂修

太宗實錄總裁官二月復為會試主考官七年遇

恩詔加一雲騎尉世職八年正月進二等子閏二月大學

士剛林以黨附睿親王多爾袞獲罪其刪改

太祖實錄辭連文程並議罪先是三年二月睿親王誠大學士等宜時具條奏文程以凡有聞見即面啟無

庸具本對王曰爾素有疾毋過勞自後可早出休
沐逾數月甘肅巡撫黃圖安請終養部議借端規
避應革職文程白鄭親王濟爾哈朗曰終養乃人
子至情不宜如部議睿親王怒其不先白已也下
法司論罪既而釋之後文程因不合睿親王意時
稱疾家居至是

世祖以文程在

盛京時不附貝勒碩托後亦不附睿親王衆所共知

免其罪革職留任未幾復原職九年遇

恩詔晉一等子尋任議政大臣疏曰臣見直省土地荒蕪
賦虧餉絀國家大害在此然軍屯可與國家大利
亦在此昔明太祖嘗言養兵百萬不費民間一粒
亦當元季亂後地曠行屯故耳今湖廣江西河南
山東陝西五省寇亂日久人民稀少請設興屯道
綜理之同知分理之地之無主者即為官屯其有
主而拋棄者多方招徠過期不至乃為官屯凡土

著流戶願來耕者均給以地量助牛種官分子粒
三之一三年後為永業編行保甲使守望相助其
無本者官給僱直則遠近饑民聞風踵至亦救荒
之術也初屯之時所收糧草皆道廳留貯出陳易
新為次年加墾計其難久存者就近撥供兵馬雇
舟車起運勿貪點屯民動用屯牛則屯事得永久
矣又興屯之處府縣有司聽屯道提調理屯同知
惟屯道管轄如開墾日增撫按特薦倣邊俸例三

年陞二級以酬其勞其不職者嚴糾之所當信賞
必罰也疏上

命諸王大臣會議舉行十一月以科道官當睿親王攝政
時劾大學士馮銓降革者彙原疏進呈

御覽

世祖曰諸臣所劾誠當何為以此罷耶文程曰諸臣疏劾
大臣無非為君為國

皇上當思所以愛惜之

世祖遂

諭吏部俱以原官起用十年正月請令部院三品以上大臣各舉所知不論滿漢不拘資格不計親疎取正直才守之人堪任何官列疏奏聞一官可舉數官數官可舉一官將姓名彙置

御前不時召對察其議論核其行事遇缺請

旨簡用若用後稱職保舉官加以優典否則量罪連坐

詔允所議十一年八月加少保兼太子太保時

遣官赴直省恤刑因疏言前此遣滿漢大臣巡方慮有擾民是以停止今四方水旱災傷紛紛見告亦應請停止其見禁重囚

勅各巡撫詳勘以可矜可疑者奏聞裁定從之九月以疾乞休奉

諭曰大學士范文程任事多年忠誠練達朕所倚賴乃近以積勞成病仍夙夜在公未得專事藥餌深繫朕懷暫令解任安心調攝俟病痊召用

特晉太傅兼太子太師頻

賜藥餌存問十四年

詔晉秩一級圖其象藏之內府

聖祖仁皇帝嗣位奉

命祭告

太宗山陵康熙五年八月卒年七十

賜祭立碑謚文肅五十二年

御書元輔高風以額其祠文程經事

四朝寵錫優異在

盛京時

列聖皆呼其官而不名以其形貌頗偉所

賜衣冠皆特制居恒言治天下惟在得賢庶官有才者不

以一青掩湔除拔擢時為奏請焉謝政後居別墅

中以詩書騎射教子弟性廉慎樂施與器量淵深

人莫窺其喜怒子六人承斌襲一等子爵承謨承

勲別有傳

丁文盛

子思孔

丁文盛廣寧人初為明諸生

太祖高皇帝天命六年來歸隸鑲旗漢軍

太宗文皇帝崇德三年任兵部啟心郎順治元年大兵定

山東授文盛登萊兵備道二年六月擢山東巡撫

閏六月濰縣土賊張廣糾衆數千犯萊州文盛檄

遊擊馮武卿等分勦敗賊於三埠及紅山斬賊黨

尼思齊趙朋春張廣奔平度遊擊楊遇明率兵追

及徐里疇四面環攻廣中鏃死擒斬餘黨無算十
二月文盛疏言明季馬政廢弛郵傳缺用輒索之
閭閻致滋擾累自今各驛缺馬宜即以餘存驛站
額銀隨時買補又言東省當兵燹之後村落多墟
市集皆廢明季所增牙雜二稅請盡行除免舊制
臨清東昌平山諸衛設兵五千餘至是虛額過半
文盛請裁留二千以節軍餉令州縣各募壯丁暇
則聽其自謀生理遇盜賊竊發協力捍禦又請

勅有司清理刑獄嚴禁獄卒非法凌虐疏皆下部議行三年冬荏平高唐禹城武城新城等縣為土賊剽掠

文盛請兵

上遣副都統覺善率兵往勦四年正月給事中林起龍御史金元禎交章劾文盛才庸不勝重任部議革職命降一級調用九月授河南按察使六年遷福建布政使

七年三月卒於官子思孔順治九年進士改庶吉士授秘書院檢討十四年擢國史院侍讀十八年

授陝西漢羗道康熙二年巡撫賈漢復劾思孔承
追胥役侵欺糧草逾限部議降二級調用五年補
河南開封府同知思孔詣通政司辯前在漢羗曾
以侵欺糧草之胥役斃獄產絕等情屢牒巡撫賈
漢復漢復遲久乃入告思孔無承追逾限罪事下
總督白如梅察奏咎在漢復援

恩詔免議復思孔所降級補直隸通薊道時直隸未設布
政使八年增設直隸總管錢穀守道與巡撫同駐

保定調思孔任之十四年遷江南按察使十五年授湖北布政使未之任即調江南二十一年遇計典兩江總督于成龍疏薦思孔任布政使數年籌江西湖廣軍需應期無誤大軍征勦海賊往來絡繹料理裕如且有修造蘇州府學創設育嬰堂養濟院諸善政其介性清操亦矯然特立因有督催錢糧未完各案不得與卓異之列專疏薦舉請破格擢用得

旨丁思孔供職勤慎著准為卓異二十二年擢偏沅巡撫
既蒞事倡率司道等官修造嶽麓書院置田三百
畝資諸生膏火二十四年五月疏言嶽麓書院創
自宋開寶時為四大書院之一乾道時張栻教授
於此朱子自閩至與講學數旬後朱子知潭州增
廣學舍學者益衆今修造已復舊規乞

御書匾額並

賜日講解義諸書

上允所請

御書學達性天四字俾懸書院二十七年二月調河南巡撫時裁湖廣總督標下將弁胥令候缺酌補五月裁兵夏逢龍作亂結中軍副將傅爾學叅將李廷秀遊擊金奇功守備林德千總胡耀乾馬兵周凱萬金鎰等叛據武昌巡撫柯永昇糧道葉映榴並遇害賊分掠黃州德安

上命振武將軍瓦岱率師討之調思孔湖北巡撫

詔速赴荊州防守專理兵餉思孔以武昌倉庫被賊劫掠各營兵餉俱缺先借撥河南布政使庫銀委員齎隨至襄陽即散給將士鄖陽諸營應於荊州支領者亦令就襄陽發給俾免稽遲疏報稱

上旨七月瓦岱師至黃州夏逢龍就擒伏誅其黨偽總兵胡耀乾李廷秀萬金鎰周凱偽副將林德偽巡撫傅爾學偽布政使方順偽驛道金奇功等皆降思孔至武昌察獲賊黨掠匿庫銀九萬餘兩還貯諸庫

數耀乾等八人罪並斬以徇九月復設湖廣總督
即擢思孔任之二十八年請增設武昌荊州岳州
常德水師並移辰沅宜都諸處戰艦以供訓練疏
下部議行三十三年四月調雲貴總督八月卒於
官

賜祭葬如例四十四年

御書績著南邦額表思孔家祠

張大猷

張大猷遼陽人後隸漢軍鑲黃旗

太祖高皇帝天命六年大兵克遼陽大猷時為明千總自
廣寧來降授佐領逾年明邊將誘我新附之衆往
歸遣人為間諜匿遊擊郎某所大猷發其事

太宗文皇帝嘉之予三等輕車都尉世職天聰九年以所
管丁壯缺額論罰鍰崇德三年任刑部理事官尋
擢右翼漢軍副都統四年正月大兵征明錦州以
礮擊破城旁一臺臺中敵兵尚拒守既而乘間遁

去大猷坐防範不嚴部議革職罷任得

旨從寬罰鍰六月更定漢軍旗制授鑲黃旗副都統五年
隨睿親王多爾袞圍錦州率本旗兵攻取五里臺
及涼馬山馬家湖諸處又克金塔口臺六年隨鄭
親王濟爾哈朗圍錦州會松山騎兵突出奪我紅
衣礮大猷擊卻之復同都統劉之源等攻克塔山
杏山及附近諸臺論功晉二等輕車都尉七年六
月擢兵部叅政十月隨貝勒阿巴泰征明師至渾

河築橋以濟明總督范志完集兵拒戰大猷與副都統祖澤洪擊敗之八年隨鄭親王征明寧遠取前屯衛中後所二城晉一等輕車都尉順治元年同都統葉臣劉之源等征山西追逐流賊李自成之將郭某擒斬之合兵攻克太原府城復同都統李國翰招撫郡邑賊衆據黃河濱立柵大猷攻毀之賊潰遁獲船十有五二年隨大軍定江南同都統吳守進率兵征浙江至石門縣明兵自錢塘乘

夜來嚴營大猷奮擊卻之進取嘉興府同都統格
恩圖擊敗城中出戰兵遂克其城先後取揚州崑
山常熟江陰諸郡縣皆督兵以礮克城有功三年
二月

命同侍郎已山率兵鎮守江寧總管漢軍及綠旗兵旋授
為提督江南總兵官五月叙元年以來軍功晉爵
三等男四年明故官侯峒曾之子侯元瀨等潛遣
人通明魯王朱以海於海島取偽鎮黃斌卿書以

歸為柘林遊擊陳可所獲大猷與巴山以其書入
奏得

旨嘉獎曰爾等嚴察亂萌具見公忠盡職六年率兵勦六
安州山賊賊渠張福寰自明季結黨倡亂聯據英
山霍山倚險立寨負固有年至是江南總督馬國
柱以兵進勦大猷與巴山率兵會之陣斬福寰諸
賊寨俱剪平國柱奏捷謂大猷身先士卒履險摧
鋒功居第一屢遇

恩詔晉爵至三等子世襲罔替九年正月卒於官以其子

應庚襲爵

馬光輝

馬光輝大興人後隸鑲黃旗漢軍初為明武舉

太宗文皇帝天聰四年隨其兄光遠光先來降授備禦七

年予三等輕車都尉世職崇德三年任戶部理事

官四年正月以貸官商貨物三年不償罷任革世

職六月增設漢軍官員授光輝鑲黃旗副都統五

年隨大軍圍明錦州擊敗松山杏山敵兵六年兼
任吏部叅政七年隨鄭親王濟爾哈朗攻克塔山
城及附近諸臺復攻克杏山城叙功復三等輕車
都尉世職時大軍既取錦州光輝奉

命同都統孟喬芳率八旗漢軍叅領各一往錦州督鑄神
威大將軍礮功竣還奏稱

昔八年隨鄭親王征明寧遠以礮攻克中後所前屯衛二
城晉世職為一等輕車都尉順治元年

世祖章皇帝定鼎燕京六部叅政改稱侍郎光輝仍任吏部四年考滿加雲騎尉世職五年隨征南大將軍譚泰討江西叛鎮金聲桓聲桓既伏誅譚泰承

制得便宜除授欲以光輝為江西提督光輝辭不就既而譚泰欲以都察院理事官紀國先為掌印都司國先謂文職不應授武官且云不善者以善置之善者以不善置之天下反亂職是故耳譚泰奏劾國先因以光輝辭提督事入告部議國先應棄市籍

沒光輝應罷任革世職得

旨免國先死籍家產半光輝罷副都統及侍郎任降世職
為騎都尉七年復任副都統八年

上以光輝素著軍功仍予世職為一等輕車都尉加一雲
騎尉遇

恩詔晉爵三等男是年閏二月兼任刑部侍郎五月調戶
部侍郎十月授直隸山東河南總督十年九月膠
州總兵海時行叛脅鎮標官兵從逆肆掠萊沂

間光輝統兵進勦至沂州時行引賊走宿遷結浮
橋渡河我兵乘其半渡擊之賊多墜水死時行走
河南永城光輝同漕運總督沈文奎自靈璧縣趨
永城賊據洪河集西拒戰光輝分兵左右夾擊自
午至酉殺賊無算時行窮蹙乞降光輝縛之並逮
繫其子弟妻孥及從逆裨將數人以

聞得

旨嘉獎下部議叙加一級廕一子入監十一月以疾乞罷

上以其才猷練達慰留之十一年二月

甄別督撫諸臣加光輝太子少保尋再疏乞罷

詔還京調治十二年七月卒

賜祭葬如例謚忠靖子爾泰襲爵

張文衡

張文衡遼東開平衛人初為明諸生天聰八年

太宗文皇帝親統大兵由宣化府入明邊文衡自大同走

謁言在明為代王府叅謀見明國諸臣結黨貪財

專意罔上嚴刑厚斂民不堪命臣審時度勢知天命有歸成大事者必在

聖主故徒步來歸又疏陳進取之策以收服人心為本上嘉納之授秘書院副理事官

賜田宅銀幣以大臣雅希禪女妻之隸鑲黃旗漢軍順治

元年七月授山東青州府知府甫之任總兵柯永盛率青州駐防兵征高密招撫侍郎王鰲永至青州籌備軍餉流賊李自成裨將趙應元由長山縣

結土賊數千掠民馬數百睜青州兵少佯就鰲永
招撫請置其家屬於城中而自率衆助征高密既入
城以乏糧鼓噪執鰲永殺之文衡分遣官吏告急
於永盛及登萊巡撫陳錦自往見應元許以保奏
留鎮青州即草疏佯詆鰲永激變謂應元殺鰲永
由部衆所逼願立功自効遣人齎奏應元信悅懼
庫金與羣賊縱飲會自京出征登萊之副都統和
托李率泰統師至駐營於城之西北文衡誘應元

至軍營通款和托等慰勞遣還密令我兵隨文衡入城分布防守乘夜擒斬應元及其黨數十人徧諭脅從者弗罪賊遂平二年調淮安府知府時豫親王多鐸統師征揚州過淮安文衡請禁兵卒入城市俾居民安堵軍糧戰艦及芻秣皆應期立辦三年總督洪承疇奏擢徽寧道淮安士民籲留漕運總督王文奎疏

聞不允時徽州土賊汪張飛劉時劉祥等猖獗蔓延文衡

協助諸將勦平之四年四月擢江南按察使八月授甘肅巡撫五年二月至蘭州受事三月陝西總督孟喬芳調蘭州鎮兵征四川逆回米喇印丁國棟既降復叛窺鎮兵憚於遠征陰結中軍叅將蔣國泰等詭言會議邀文衡至米喇印家文衡將至賊集矢射之遂遇害時年四十有七總兵劉良臣西寧巡道林維造守道張鵬翼副將毛鎮潘雲騰遊擊黃得成都司王之傷守備胡大年等皆同時殉節

事

聞並

賜卹有差文衡贈都察院右副都御史廕一子入監康熙

二十一年入開平衛鄉賢祠雍正十二年入祀昭

忠祠

劉之源

劉之源漢軍鑲黃旗人

太宗文皇帝天聰十年三月授叅領崇德五年五月從

上征明錦州距城東五里以紅衣礮攻克其臺復列礮城北攻克瞭馬臺擊斃六人降其卒十三人是年兩黃旗漢軍都統馬光遠因疾解任以之源代之六年八月隨睿親王多爾袞圍松山以礮攻克近城四臺斬守備二都司一擒副將王希賢叅將崔定國都司楊重鎮等明兵尋自松山遁高橋迤南三臺之源率前隊兵攻克之多斬馘七年四月隨鄭親王濟爾哈朗圍塔山列礮城西擊毀城垣二十

餘丈殲其守城兵衆進克杏山城北一臺復擊毀
杏山城城中人驚懼悉降叙功予二等輕車都尉
世職時分設八旗漢軍都統授之源鑲黃旗漢軍
都統八年十月隨鄭親王攻明中後所拔其城斬
遊擊吳良弼都司王國安等進征前屯衛復以礮
攻克其城叙功晉一等輕車都尉世職順治元年
大兵定燕京

命之源同都統李國翰勦平畿南餘賊時流賊李自成遁

陝西偽伯陳永福等竊據太原之源同都統葉臣等攻克其城又同都統巴哈納自汾州勦賊至平陽斬賊四千餘山西州縣悉就招撫師還得

優賚二年隨順承郡王勒克德渾征流賊至湖廣同李國翰殲賊應山縣時偽總兵馬進忠降而復叛之源同都統金礪擊敗之武昌奪賊艘六十餘復追敗餘黨於湖泊明年叙功加一雲騎尉五年

命為定南將軍率左翼漢軍隨鄭親王征湖廣六年進功

攻湘潭明總督何騰蛟分兵三隊出城拒戰我軍
分擊大敗之克其城生擒騰蛟乘夜率兵追勦馬
進忠平明薄其營奮力衝擊遂克寶慶并破南山
坡九營陣斬其總兵馬有志胡進玉等進忠僅以
身免又破袁宗第營於洪江駐師沅州其總兵王
强來犯之源敗之於便水驛斬級七百及副將三
人累遇

恩詔晉世職至一等男又一雲騎尉八年同都統金礪駐

防杭州時明大學士張肯堂蕩湖侯阮進定西侯
張名振等擁魯王朱以海據舟山之源與總督陳
錦總兵田雄會師進勦由寧波之定關出海阮進
集戰艦以拒我師敗之於橫洋生擒進復分兵擊
勦三戰皆捷遂至舟山之螺頭門肯堂集城中兵
六千堅守十餘日我兵用雲梯破城肯堂及尚書
李向中吳鍾巒侍郎朱永佑等縱火自焚死名振
擁魯王遁三盤島之源遣總兵馬進寶等率兵追

克之焚其積聚復敗之沙埕收各嶼戶口八千五百餘悉令歸農因與陳錦金礪奏設陸兵一千為中營水兵二千為左右營駐守舟山增設弁備統以副將叙功晉三等子世襲罔替十六年八月授鎮海大將軍駐防鎮江疏言京口要地百川匯流所以通京南半壁之財賦輓運北輪近因海賊鄭成功狡逞糾逆黨連艍入江來犯幾至橫截運道臣愚賊之所長在水宜先練習水師以資防禦夫

防海之策有三出海會哨勿使入江上策也循塘拒敵勿使登陸中策也列陣備兵勿使近城策斯下矣顧水師必先饋造船隻今礮火器具水手舵工百無一備何以禦賊乞

敕總督卽廷佐速為製備下兵部速議行之十七年七月

疏陳三事一沿海居民向有雙桅沙船一名捕魚亦名立功自明時因引倭入寇久經飭禁至今未盡革除姦民多夤緣汎官買口私出因臣申嚴海

禁始開報船戶花名投營効用此等船隻造作堅固其人皆熟於洋面水道若徒許令投營不為安插得所日久必仍販載禁貨出洋或且為海賊耳目今令京口水師造船二百招募水手舵工八千餘名一時正難精當莫若悉將兩項船隻查驗堪用者量給價值各船戶照例給以糧餉既可省鳩庀製造之費亦可杜私通海逆之弊一汛防向設戰船分散各營船式低小猝遇海賊大艘勢難相抵

臣思京口水師既造船隻旌旗舳艫煥然改色江寧亦有沙唬各船備用則此等小舟除狼山福山吳淞各口酌留數號以備傳遞哨探之用其餘不必槩行修補以省無益之費一邊海汛地緊要凡礮臺烽墩橋路宜修葺高廣豫備不虞臣已屢飭沿海州縣至今玩誤不行請

敕督撫嚴行申飭疏下兵部並從其言

詔江南督撫提鎮實心奉行無得因循怠玩是年緝獲海

逆鄭成功所遣偽兵部黃徵明得交結蘇松提督馬逢知及逢知受賄關通狀入奏

特命刑部侍郎尼滿赴江南會同之源審擬事俱實逢知伏誅康熙元年十二月招降偽肇敏將軍陳文達偽總兵羅永德等三年四月乞休

召還京仍任都統四年七月復乞休得

旨劉之源自

太宗時委任勤勞年久著以原銜加太子太保致仕旋以

其子副都統劉光代為都統八年內大臣鰲拜獲罪拘禁之源與光並坐黨附革職任擬立斬籍沒

上命從寬俱免死之源尋卒二十年妻胡氏叩

闕訢之源功可抵罪

詔復原銜並予三等子爵以光襲

胡有陞

胡有陞錦州人

太宗文皇帝崇德元年睿親王多爾袞豫親王多鐸征明

錦州道人崔應時與民人張紹楨門世文門世科
秦永福等五十人謀以城降使有陞持書詣我軍
期為內應豫親王與書齋還明將覺之執應時等數
十人置諸獄有陞同紹楨世文世科永福乘間脫
走來歸各

賜冠服鞍馬妻室奴僕授世職有差有陞得授三等男隸
鑲黃旗漢軍七年隨貝勒阿巴泰征明薊州越燕
京趨山東敗明總督范志完兵於渾河八年隨鄭

親王濟爾哈朗征明寧遠攻克前屯衛中後所二
城叙功晉二等男順治四年授南贛總兵五年總
兵金聲桓偕副將王得仁據南昌叛糾衆犯贛州
先以書招左協副將高進庫進庫不從勒兵出戰為賊
先鋒劉一鵬所敗乃收兵為固守計巡撫劉武元巡
道張鳳儀分守城東西有陞率健卒沿城策應賊
穴城將置火具仰攻有陞以石塞所穴竄賊計遂
沮閱三月城中糧匱有陞督兵出戰賊敗却數里

聲桓聞大軍由九江直搗南昌倉皇引衆北走有
陞追擊之斬馘無算未幾廣東叛鎮李成棟犯贛
州有陞率諸將乘賊方鑿壕分兵東西南三門出
擊大破賊成棟僅以數騎遁先是南贛總兵柯永
威遷湖廣總督請以南贛鎮兵二千自隨部議如
所請有陞疏言贛地當江湖關鍵風尚好武輕生
奸宄易作控馭宜嚴且金逆未平正資勦援以固
疆圉廣東賊寇尚多鎮兵久習水土熟知地利便

於征勦不宜移去奏入乃

詔前所議移兵仍留贛鎮而令永盛另募新兵明年聲桓成棟等相繼剪滅大軍凱旋土賊仍未靖上猶劉飛龍南葉芝南石城鄒華雱都彭順慶瑞金陳其綸皆負固抗逆有陞同武元檄將分剿先後蕩平叙功加左都督

賜紫貂冠服甲冑佩刀鞍馬三遇

恩詔晉爵至三等子十年四月平南王尚可喜靖南王耿

繼茂疏述有陞深算老謀同巡撫劉武元堅守南
贛與粵東唇齒相依功宜錄叙部臣以有陞業已
晉銜都督寢議

上特詔曰胡有陞同劉武元堅守岩城屢挫金王二逆及
廣東叛鎮李成棟犯贛又能出奇制勝以寡擊衆大敗
賊兵四省咽喉遂得安堵忠誠可嘉勞績茂著雖已晉
銜未足酬功朕加意封疆不吝爵賞其再議優叙於是
加太子少保十三年二月入

覲

賜冠服鞍馬十七年以年老解任回旗康熙三年劉武元之子濱疏請追叙守贛功既加騎都尉世職有陞援例以請部臣議加雲騎尉得

旨胡有陞守贛州全城敗賊之功不下於巡撫劉武元亦予騎都尉世職遂合所有世職為一等子八年九月卒祀江西名宦祠子啟泰襲爵後改隸鑲白旗

楊名高

楊名高遼東人

太宗文皇帝時率族屬百餘人來歸隸鑲黃旗漢軍授佐領
尋兼任兵部理事官崇德七年四月隨鄭親王濟
爾哈朗征明攻克塔山杏山城及附近諸臺論功
予雲騎尉世職八月同副都統馬光輝等往錦州
督鑄神威大將軍礮十月隨饒餘貝勒阿巴泰征
明擊敗明總督范志完兵於渾河橋明年師旋至
牆子嶺復敗敵於南山其年冬隨鄭親王取明前

屯衛中後所二城順治元年叙功晉騎都尉二年
任叅領三年擢都察院叅政六年授福建漳州提
督時福建大田一邑為偽新建王朱由模所據並
連結延平高峯諸寨賊衆為聲援七年春召高率
師進剿破賊石磯嶺由模聞風遁走永安延平副
將王愛臣追獲之賊渠陳光等據高峯寨密遣人
往德化約賊黨鄭文薦來援名高令副將韓尚亮
率兵截擊圍其寨賊被圍急從東門突出我兵奮

勇衝擊賊陷壕死者過半師至大田賊衆四潰進
擊之龍門橋俘馘甚衆擒偽都督郭奇偽總兵廖
明正諸寨悉受撫是年冬又率兵剿賊邵武賊衆
自建寧遁入江西新城縣名高分兵為中左右三
路而進自與總兵王之綱殿後直抵賊營追剿三
十餘里擒偽寧洪伯洪國玉偽總兵李安民王恒
美等獲牛馬鎗礮無算得

旨下部議叙予紀錄三遇

恩詔晉世職二等輕車都尉九年海賊鄭成功偕其黨鄭森等由廈門出掠連陷長泰漳浦海澄南靖諸邑旋糾衆二十餘萬寇漳州屯於鳳巢山名高督兵衝擊破之賊退據海澄所陷長泰諸邑以次克復會成功之父芝龍疏請以書招降成功

詔允罷兵議撫成功不遵

詔仍糾賊肆掠突陷漳州府及惠安同安安溪永春德化仙遊諸州縣十二年給事中魏裔介劾奏名高禦

剿急玩貽悞封疆請

勅處分疏下總督佟岱察核十二年佟岱以名高調度無方馳援不力覆奏於是革任尋卒子天福襲世職

郭廷佐

部廷佐漢軍鑲黃旗人先世居廣寧父熙載為明生員

太祖高皇帝天命七年征明廣寧熙載率遼河西四堡兵民來歸授備禦分轄降衆守其地嘗擒獲逃卒五

十人論功予三等輕車都尉世職崇德元年卒長子
廷輔襲世職廷佐其次子也由官學生授內院筆
帖式順治二年擢

國史院侍讀三年隨肅親王豪格征四川流賊張獻
忠六年隨英親王阿濟格征大同叛鎮姜瓖是年
遷秘書院學士十一年授江西巡撫江西自明末
游遭兵亂水旱頻仍逋賦甚多廷佐再疏請蠲緩
以蘇民困並得

旨俞允時土賊洪國柱繆我章等剽掠饒州廣信間廷佐
遣將往剿降之十二年擢江南江西總督十四年
疏言江南逋賦多至四百餘萬兩宜分核官侵吏
蝕民欠各為一冊專責右布政使按籍督催其新
徵歲賦以左布政使稽其收納則新舊牽混之弊
可除至徵收之州縣衛各官舊例未完者輒予降
調官屢更易吏民益輕玩催科反無實效宜令戴
罪留任催完又江南襟控數省商賈所聚前者大

軍經行以船載兵估舶因觀望不至宜如江西例
官為造船備用以蘇商困

上嘉其言深切時弊下所司議行十六年以巡按衛貞元
劾按察使盧慎言婪贓不職廷佐不先劾奏及奉
旨詰問復巧言支飾部議黜罷得

旨革職留任是年二月廷佐因巡閱江海密陳海防機宜
言海賊鄭成功擁衆屯聚海島將侵犯江南而江
省各汛兵數無多且水師舟楫未備請調發隣省

勁兵防禦疏下部議以隣省亦需兵防守寢其事
五月海賊陷鎮江襲據瓜洲遂犯江寧時城中守
禦單弱會副都統噶楚哈等從貴州凱旋率兵沿
江而下廷佐與駐防總管喀喀穆邀入城共議擊
賊挫其前鋒獲舟二十餘偽印二賊首鄭成功旋
率賊衆逼城連營八十有三賊艘蔽江分截要路
廷佐與喀喀穆等晝夜堅守檄調各路步騎及水
師俱至同諸將定計以滿洲兵禦擊賊營而令綠

旗兵從儀鳳鍾阜二門出戰擒偽總統余新及偽
總兵二次日廷佐居守議以提督管効忠總兵梁
化鳳等分水陸進擊大敗賊衆擒偽提督甘輝偽
總兵張祿郭良玉焚毀賊艘五百餘賊之在鎮江
瓜洲者皆遁入海捷

聞得

旨嘉獎下部議叙尋兵部請議前此失陷所屬城邑罪
上以廷佐於失事後能固守江寧擊敗逆賊

命免議祇停叙功嗣復以失糾巡按王秉衡劣蹟部議降

調得

旨寬免十八年

聖祖仁皇帝即位分江南江西總督為二以廷佐任江南
總督康熙四年復舊制廷佐仍兼督江西七年十
一月以疾解任先是致仕大學士金之俊家居得
匿名書於門詆其在明居顯秩曾降流賊李自成
之俊以訴廷佐令有司窮治之旋以書有悖逆語

疏

聞

上以廷佐窮治匿名書帖將株連無辜並

諭責之俊違例妄訴俱下部察議八年正月

命削之俊加銜廷佐於病痊起用日鐫二級十三年逆藩

耿精忠反福建總督范承謨遇害

上特起廷佐為福建總督廷佐受

命即奏言臣孫雖為精忠胞弟之婿然臣誓不與逆賊俱

生願力疾前驅殲除叛寇

上嘉之

賜鞍馬甲冑以寵其行時福建俱陷賊廷佐至浙江隨康

親王傑書駐金華十五年六月卒

賜祭葬如典禮祀江西名宦

趙廷臣

趙廷臣漢軍鎮黃旗人順治二年由貢生授江南

山陽縣知縣遷江寧府江防同知因催徵逾限罷職

十年大學士洪承疇赴湖廣經畧軍務奏薦廷臣
清幹素著請以隨往軍營委用得

旨俞允十一年授湖廣分巡下湖南道十三年調本省督
糧道十五年隨大兵定貴州遂授貴州巡撫明年
擢雲貴總督先是土賊馮天裕等竄伏山寨勾結
亡命陷湄潭犯甕安至是廷臣調思南平越遵義
偏橋諸路兵擊破賊營斬天裕及偽總兵冉宗孝
等疏言貴州古稱鬼方自城市而外四顧皆苗雖

種數不同要皆專事鬪殺故馭之為難臣以為教化無不可施之地風俗無不可移之鄉請今後應
罷土官年十三以上者令入學習禮由儒學起送
承襲其族屬子弟願入學讀書者亦許其仕進則
儒教日興而悍俗漸變又每遇歲終土官各上其
世次之籍於布政司布政司上其籍於部遇承襲
時有爭論者按籍立辨斯釁端預杜矣又奏改馬
乃曹滴諸土司為流官復言黔省曩為寇踞改衛

為府改所為縣紛更法令民苦重役今底定之後
應仍舊制滇省田土荒蕪當亟招民開墾其衝路
各州縣請以順治十七年本省秋糧貸為春種之
需會吳三桂以五象進獻

上命停止送京廷臣因疏請概停邊貢以省解送之勞疏
俱下部議行尋以剿平土酋龍吉兆功加兵部尚
書

聖祖仁皇帝御極調廷臣浙江總督彙叙督墾雲南荒田

功加太子少保康熙二年廷臣疏言浙江逋賦不清由徵解繁雜請以一條鞭徵收之法即用為一條鞭起解之法令各州縣隨徵隨解布政司察明註冊至為簡便又請移海島投誠官兵分插內地杜賊人煽誘定水師提鎮各營設兵之制以備水戰杭嘉湖三府毗連太湖泖湖易於藏奸請增造快唬船撥兵巡哨部議俱從其請時海賊鄭成功死廷臣招其黨偽將軍阮美偽都督鄭殷偽侍郎

蔡昌登等皆相繼降獨偽兵部張煌言率衆遠遁
廷臣馳赴定海與提督哈爾庫張杰定議檄水師
由寧台溫三府出洋搜剿斬賊六百餘降其偽副
將陳棟知煌言披緇竄伏海島廷臣選驍將徐元
張公午飾為僧人服率健丁潛伏普陀山朱家尖
蘆花澳三路以伺得賊船急擊之擒賊林生陳滿
等誘使言煌言竄處即駕所獲賊船乘夜至懸山
范澳自山後潛入賊帳擒煌言獲其偽敕印奏入

得

旨嘉獎煌言伏誅四年疏請崇節儉以維風俗又言用人宜寬小肯請

敕部分別罪誤降革人員量才錄用以收得人之效又言駐防滿洲收買民人宜令地方官給與印契並曉諭居隣俾知某人賣身旗下後或逃歸有容留者乃可坐其窩逃之罪事並下部議行會部檄各省流寓人責令回籍廷臣疏言革職解任之員應即

令回籍其身故而子孫願留及流寓士民有丁口
田土已附版圖者宜聽其自便得

旨漢軍速催回旗餘如所請五年招降海賊鄭錦之偽都
督李順等六年閏四月以病求罷

上慰留之八年二月卒於官

賜祭葬如典禮謚清獻廕一子入監

高天爵

子其佩

高天爵漢軍鑲白旗人後改隸鑲黃旗先世居鐵

嶺父尚義以隨征松山杏山及太原功予二等輕
車都尉世職任杭州駐防協領天爵於順治四年
由蔭生任山東高苑縣知縣考滿遷河南信陽州
知州十一年以經畧洪承疇薦擢湖廣長沙知府
大兵進剿明桂王朱由榔天爵理餉濟軍十三年
因父病假歸十六年補江西建昌知府先是廣昌
縣山賊王昂傳勝辛連升周由義陳太字蕭來信
夏登選等聚黨數千時出剽掠據羊石滴水二砦

為老巢形勢險峻官軍仰攻輒為賊滾木礮石所
損傷因罷攻招之降王昂傳勝佯就撫仍伺隙煽
亂官軍擒之斃於獄餘賊益負固抗拒十八年五
月天爵與巡道張永祺叅將王之任議乘風雨交
作漂流樹木衝斷橋梁賊俱歸巢後分布官軍絕
賊去路直搗滴水砦進攻羊石砦斬賊千餘盡毀
賊巢賊傷斃及墮崖死者無算生擒辛連升周由
義陳太字蕭來信夏登選及王昂之父王尚智並

斬於軍賊所掠丁口悉遣還其家巡撫張朝璘疏
報十年砦賊一旦掃除由道府區畫周詳捐貲懸
賞鼓勵士卒冒險奏功

詔下部察叙天爵得軍功加級康熙十三年逆藩耿精忠
據福建叛縱黨入江西犯建昌時天爵已遷兩淮
鹽運使或勸之速行天爵曰吾守此五十六年雖
受代豈可遽離遂率家丁數十人禦賊萬年橋城
守副將趙印已降賊秉天爵力戰從後縛之以獻

賊載送入閩再四誘降終不屈賊拘繫之越歲餘
天爵與副將王進武舉胡守謙將材楊起鵬姜山
等同謀遣千總徐德功出仙霞嶺請大兵入關陰
結死士為內應賊將王廷彥許之耿精忠遂以十
五年九月四日遇害十九年福建巡撫楊熙疏列
同日殉節諸人部議卹廕有差天爵得

旨贈太僕寺卿廕一子三十五年福建巡撫卞永譽請以
天爵與原任福寧總兵吳萬福福州知府王之儀

邵武知府張瑞午建寧同知喻三畏邵武同知高
舉侯官知縣劉嘉猷尤溪知縣李埴福州城守千
總廖有功等合建一祠於省城西門外春秋致祭
得

旨允行四十四年子其佩官工部員外郎為父請

賜扁

御書蓋忱義烈以額其家祠四十六年其佩官浙江溫處

道復為父請謚

賜謚忠烈雍正四年長子其位官大學士其佩官都統同

奏請

諭祭得

旨高天爵捐軀盡忠大節可嘉高其位高其佩乃現任大學士都統大臣為父請卹甚是著加禮部尚書銜追賜卹典七年入祀昭忠祠其佩天爵第五子康熙二十一年以父蔭授江南宿州知州二十五年丁母憂歸三十二年補雲南姚州知州三十六年內遷工部

員外郎四十四年授浙江溫處道五十一年六月
以署運使虧空鹽課革職尋開復五十四年補四
川永寧道五十九年九月遷四川按察使雍正元
年三月內遷光祿寺卿協理刑部侍郎事九月擢
刑部右侍郎二年正月擢正紅旗漢軍都統仍兼
刑部侍郎三年四月

命其佩同侍郎史貽直往四川審理年羹堯誣罰茶商私
佔鹽窩各款又陝西郃陽縣因私鹽致死無辜八

百餘人事皆得實十二月因年羹堯冒銷四川
鋪司銀兩係其佩按察使任內事

特旨詢問以鋪司未設乾沒屬實覆奏下部議追繳五年
七月刑部審擬主事菩薩保藏匿隆科多應追入
官銀聽其詭稱祖遺給還故入首告者誣罪其佩
與尚書賽爾圖侍郎海壽等並坐黨惡徇私肆
行欺罔論斬

詔從寬免死革侍郎仍留都統任七年二月因追繳四川

任內冒銷帑銀逾限不完革任十二年九月卒其
位別有傳



欽定八旗通志卷一百八十九

欽定四庫全書

史部

欽定八旗通志卷一百九十

欽定四庫全書

欽定八旗通志卷一百九十

人物志七十

大臣傳五十六

漢軍鑲黃旗二
峻

李興元
范承謨

盧崇
張長庚

靳輔

李興元

李興元遼陽人隸漢軍鑲黃旗順治五年由拔貢
生授直隸沙河縣知縣卓異遷祁州知州游歷江

西吉安府知府康熙五年改補直隸永平府知府
查解逃人六十名以上叙功卽陞七年遷長蘆鹽
運使八年轉陝西隴右道十一年擢雲南按察使
時

命察釋藩下佔民間子女為奴者興元力遵行十二年十
一月逆藩吳三桂反集衆脅受偽職興元厲聲抗
言曰汝內為國戚外封親王受

恩最重何為叛我為丈夫可殺不可辱惟一死以報

朝廷吳逆囚之累繫其家屬閱六載終不稍屈十八年十月大兵恢復湖南時三桂已死逆孽世璠徒興元於蒙化十九年大兵入黔逆勢日蹙偽閣部郭壯圖棄黔回滇慮後患十月遣賊黨絞死興元家口仍羈候二十年十月大兵困滇城興元二子蔭秀奇秀俱被殺雲南平其第三子萃秀詣軍前申訴二十一年巡撫王繼文察核得實具疏請卹得旨李興元贈太常寺卿廕一子入監讀書雍正七年入祀

昭忠祠乾隆十六年

特旨李興元雖從前未賞世職但為國効忠情甚可憫
著加賞恩騎尉世襲罔替萃秀由廕生授四川廣安
州知州累遷湖廣安陸府知府元孫肇祥襲恩騎
尉由鑾儀衛治儀正授直隸懷柔都司調八溝都
司四十一年遷廣東韶州遊擊

盧崇峻

盧崇峻漢軍鑲黃旗人祖國志明廣寧守備拔誠

授三等輕車都尉崇峻初由官監生考授戶部副
理事官順治五年三月襲世職兼任佐領閏四月
遷禮部理事官三遇

恩詔加世職至三等男十一年授叅領十二年駐防京口
十三年擢吏部右侍郎十四年總督宣大軍務十
五年缺裁還京十八年授廣東總督康熙元年以
肇慶總兵缺裁請將所屬諸營歸附近各副將轄
久之時廣東多土寇依險竊發二年七月崇峻遣兵赴東

莞新安殲賊九百餘八月

命同都統宜里布查勘邊海九月復捕斬香山賊首趙劈
石興寧賊首李宗韜而廣西賊首陸明初譚國經
譚化春韋太寧等流入廣東之廉州猶寇掠為害
三年八月崇峻檄遊擊安邦等擊斬之會海賊蘇
利既降處碣石衛畏遷復叛九月崇峻與平南王
尚可喜合兵搗剿擒利誅之得

旨嘉獎下部議叙十二月疏言化石一營額兵僅六百名

向設叅將守備各一千總二把總四兵少官多不符營制請裁叅將及把總二又石城地處衝要守備應駐石城分千把總各一駐化州聽高雷總兵轄部議如所請是月丁父憂

命在任守制四年三月剿海賊楊二等餘孽追至安南外境殲千三百餘燬船四十六人剿平新會新寧增城土賊四月追斬蜚寇李榮於海口降其衆四千餘並下部議叙尋疏言廣東邊界應各留一出海

之口由水路者香山縣以順德橫石磯為口由陸路者廣南衛以城岡堡大鵬所以歸善淡水平海所以白雲墟海門所以潮陽南關為口驗照放行便官軍糧道並嚴禁奸民出海部議從之是月崇峻以廣東連歲用兵請蠲康熙四年以前逋賦奉

旨順治十八年以前拖欠錢糧已頒赦盡行蠲免今盧崇峻復將康熙四年以前積欠請蠲徇情於下殊為不合著嚴飭行六月疏請勒無度牒僧道還俗開墾荒田

允之尋

命回京終制五年三月補河道總督五月疏言臣標三營專任防河兼備通漕遇事分遣四應康熙元年沂鎮總兵楊捷派防金鄉鉅野魚臺東平單陽陽穀六州縣舊無此例臣標兵祇二千五百餘名即盡歸河干猶恐不敷調遣豈能兼顧懇將臣標官兵不許提鎮越管其分防者撤歸另於就近派撥再各省總督皆節制巡撫提鎮臣既專管河道各提督

亦有防漕之責可否照例聽臣節制

詔下其疏於部以崇峻不合請節制提督

特旨嚴飭部議允撤河標分防州縣兵八月追叙平蘇利

功加一雲騎尉為二等男十一月授山陝總督六

年八月丁祖母憂仍在任守制十月疏言前因西

番部落戀收內地且布浮言臣親赴莊浪防禦現

在番衆俱歸原處駐收其台吉等亦遣使服罪官

兵應撤報

閏十一月以捐銀助修通州城垣加兵部尚書銜十二月
奏准回京終制以違例取勘合擅支夫馬經兵部
劾奏

敕部議處八年八月

命吏部覆核各督撫功過部議以崇峻功少過多應降二
級調用得

旨削尚書銜留三等男世職隨旗行走十八年署副都統
隨大軍擊逆孽吳世璠黨於松滋縣復其城二十

年進取雲南二十一年還京二十二年授協領管
火器營事四十年卒子承祜降襲一等輕車都尉

佟國正

佟國正漢軍鑲黃旗人姓佟佳順治七年由拔貢
生授江南無為州知州十二年遷直隸大名府知
府十六年遷廣東南韶道十七年調陝西延綏靖
邊道十八年牒陳四事一靖邊道轄七保二所屯
糧向由各保所將弁徵解道臣督催今奉

旨兵馬全歸提鎮錢糧專任撫臣請將屯糧改歸西路管糧同知徵解一營保兵缺祇應募充不得勾屯民妨農業一欠糧刁民往往投充營伍向來將弁猶屬撫道甄別今文武不相統攝難保無匿庇情弊請嗣後許移文將領追究若該管徇庇立即揭叅一靖邊道之設向以稽核兵馬整飭邊防今官兵既歸提鎮管攝錢糧請改同知徵解道臣已屬冗員乞裁汰巡撫張中第據牒以

聞下部議從之康熙二年改補江南淮海道三年遷安徽按察使十三年遷江西布政使時逆藩吳三桂耿精忠相繼叛賊兵分犯江西會巡撫白色純卒大將軍安親王岳樂奏國正甚得民心

特擢江西巡撫十五年正月大將軍簡親王喇布言贛州為江西門戶投誠將士雜處彈壓需人

詔國正赴贛州駐守十一月廣東從逆提督嚴自明總兵張星耀等糾衆偏南康國正遣副將許盛等剿賊

於庫鎮鋪破其營十七追七十餘里斬獲甚衆賊
遁走南安逆黨黃士標王割耳等犯信豐國正遣
守備楊以松與副將周球分三路擊之斬首二千
餘賊潰竄南雄十二月遣許盛等勦上猶賊復
其城又遣周球等擊敗偽將郭應輔于黃土關斬
賊五千復龍泉縣龍泉舊以守備駐防國正言地
介邊鄙密邇湖南桂東守備不足彈壓請改設遊
擊從之是年遣隨征官馬贄招降偽副將羅復彪

都司張元仁總兵劉永琪等國正聞大兵克復汀
州恐賊竄入贛州密飭營汛嚴守並分遣叅將劉
體君及周球等由間道相機恢剿十六年正月大
破賊於五里排復會昌縣偽總兵楊夢月降尋復
瑞金縣先後招撫偽總兵賴鼎球等百五十二人
兵萬六千五月復崇義縣招降偽總兵賴榮等十
七人兵萬餘逆賊韓大任自寧都敗竄萬安國正
慮逸入楚境密調兵赴良口大王廟黃塘截其歸

路別遣將繞出興國縣田村大江口斷賊糧道賊
窘甚竄突復遣遊擊楊以松等四路追剿十二月
擊賊於鷓鴣寨十七年正月追至老虎洞大敗之
大任窮蹙走汀州詣康親王傑書軍門降江西平
國正還省城八月叙功加兵部右侍郎銜十月加
兵部尚書銜授正一品階十八年正月左副都御
史楊雍建以江右為衝繁要地國正蒞任數載治
蹟無聞流移未能盡復田野未能盡闢分牧之有

司未能奉法請

勅令國正

陛見詢以地方利弊民生休戚國正之庸碌無能難逃

睿鑒

詔國正明白回奏時舉行京察國正遵例自陳

上以國正才力不及降二級調用覆疏入部議國正已降

調毋庸議四十七年正月卒於家

范承謨

范承謨漢軍鑲黃旗人大學士范文程第二子也
初任侍衛順治八年更定八旗漢軍考試之例承
謨中式舉人明年成進士選庶吉士授宏文院編
修十二年遷秘書院侍讀學士十八年

聖祖仁皇帝御極擢國史院學士康熙三年以疾乞假尋
補秘書院學士教習庶吉士充纂修

世祖章皇帝實錄副總裁官七年授浙江巡撫九年杭州
嘉興湖州紹興諸府被水承謨奏貸藩庫銀八萬

兩糶米湖廣以平糶應徵漕米請每石折銀一兩
於明年麥熟後徵解其白糧分三年帶徵被災重
者如例蠲免並得

旨允行先是寧波金華衢台溫處諸府屬荒田以前任總
督趙廷臣請除額賦有

旨令承謨履勘至是承謨遍歷其地奏豁荒棄田地二十
九萬四千六百餘畝水衝缺額田地二萬一千九
百餘畝十年以疾請解任

命乘驛回京調理浙江總督劉兆麒提督塞白理各疏言
浙省年來當荒歉時而民生不致重困者皆撫臣
承謨之力今以病請告百姓投詞攀留積一百五
十餘紙不敢壅於上聞給事中姜希轍柯聿御史
何元英等亦言承謨受事三載愛民如子餽遺請
謁不通劾奏貪墨廉治巨猾剔除加耗陋規私派
積弊單騎勘荒悉心賑恤浙人愛戴深於饑渴今
雖積勞致疾懇

特勅勉留

上諭吏部曰前因浙江巡撫范承謨以患病具奏准其回京調理今據督提等奏稱百姓愛戴號泣請留情詞懇切特順民情仍留原任十一年八月承謨疏言浙省徵輸白糧其加耗多寡不一湖州每石加五斗五升嘉興每石加八斗為運丁舂辦諸費請嗣後令糧戶以舂白米輸納概限加耗四斗五升又請豁台溫二衛康熙九年以前荒逋銀兩及石門平陽未

完輕齋月糧等項皆下戶部議行十月擢福建總督承謨以海疆重任難副辭

上弗允因疏請

陛見十二年七月至京

召對承謨奏舊疾未痊

上遣御醫診視

賜藥餌逾月疾稍愈

命馳赴新任

賜冠服鞍馬

遣侍衛烏丹傳諭曰爾向有賢聲與他人不同且福建邊疆重地海氛未靖爾其益加勉勵副朕委任初福建總督駐漳川至是將檄靖南藩屬還京

特命移駐福州承謨奏攜其家舊

賜蒙古壯勇八十餘人以行甫抵任聞逆藩吳三桂反承謨察耿精忠有異志綜計督標兵少又與精忠所部習不足恃乃疏言閩省經制兵自康熙八年依

部議裁汰已及三千餘名尚應裁汰二千五百餘名
現在兵單汎廣請暫停裁汰過缺以投誠人充補
又請巡行海濱酌寬邊界令民開墾分遣鎮兵屯
種隙地以裕軍餉疏上未及行精忠已叛先佯言
海寇至邀承謨議事巡撫劉秉政陰附精忠促承
謨行承謨知有變左右盡擐甲以從承謨曰衆寡
不敵備無益也乃坦然按轡至則逆衆蜂屯露刃
承謨挺身前抗辭罵賊精忠困以桎梏閉之隘室

晝夜防伺甚密使毋死承謨罵不絕口一日精忠
遣東政說之降承謨奮足蹴東政仆地叱左右掖
出曰賊誅戮將不遠茲先褫其魄矣為賊困踰二
年冠

賜冠衣辭母時衣每朔望奉時憲書一冊懸之北面跪拜
間為詩文以桴炭畫壁上當承謨甫為賊困時部
曲有張福建者手雙刀奮呼奪門連斃賊人力竭
被執死又蒙古人嘛呢為偽散騎郎精忠遣之守

承謨感承謨忠義謀使出走事洩精忠將磔之嘛
呢大言曰吾寧與忠臣俱死不願與爾逆賊同生
及大兵破仙霞關精忠將降飾辭冀免死忌承謨
暴其罪惡夜遣逆黨逼承謨就縊幕賓無錫嵇永
仁會稽王龍光華亭沈天成從弟承譜及親屬家
丁隸卒五十三人並遇害賊移屍焚諸野泰寧騎
兵許鼎乘夜負承謨燼骸藏之明年觀還京

上遣內大臣侍衛奠酒福建巡撫楊熙疏列精忠叛後死

事諸臣為承謨請優卹總督卽廷相復專疏言承謨於康熙十三年三月精忠邀以會商公事脅之從逆承謨憤怒不屈遂遭羈繫至十五年九月十六日夜半精忠遣人縊之承謨猶言

主恩未報整衣冠叩首然後就縊親屬幕賓及隨從諸人盡被賊縊死閩人追思其任總督時多愛民惠政聞遭慘變每酸心掩泣言之其純忠勁節久而愈堅富貴榮利不能動其心妻子昆弟不足縈其慮

視倉卒遇變激烈捐軀者更未易多得乞

勅部優加贈謚卹廕並於閩省立祠褒祀以慰人心

詔所司優議贈兵部尚書加太子少保廕一子入監

賜祭葬如典禮謚忠貞

御書碑文賜其家三十四年福建巡撫卞永譽以士民籲

建專祠於州入奏

御書忠貞炳日以額其祠四十七年承謨子時崇官廣東
巡撫復疏述前此福建督撫為嵇永仁等請贈部

臣以生員無贈銜例寢議乞

特敕追贈入祠於是贈嵇永仁王龍光沈天成范承譜國子監助教學正有差並從祀承謨祠

世宗憲皇帝時以承謨與嵇永仁等入祀昭忠祠承謨所著有吾廬稿浙閩奏議百苦吟畫壁集

聖祖仁皇帝又嘗允時崇請

御製承謨畫壁集序曰朕惟帝王教化首重名節所以維繫人心扶樹綱紀也古人臣以身事主守土膺疆

或遇蚤賊潛生豺狼勃起則捐軀矢志取義成仁而其
激烈慷慨之氣間發為文辭雖質直無華後世論錄終
有不可泯滅者以其出於忠義之誠本乎性情之正也
福建總督范承謨名臣之子授節閩海方值逆豎盜兵
偏隅煽煽籌畧未展橫罹幽繫閱三寒暑貞操彌堅故
其皭然不滓之志縈紆鬱屈無所攄露乃以墻壁為書
箋以桴薪為筆墨題分甲乙字辨衡從日月既深篇章
漸積名曰畫壁記實也卒能終始不撓歸於正命若承

謨者可謂冒白刃而不疑守丹心而自信者矣夫以茹
荼含檠之餘每念不忘君父故詩文不必盡合於古之
作者而浩然之氣流行充溢當其冒填聲咽髮植風生
土塊灰九同於利劍禿毫斷梗等比霜矛寫忠孝之性
靈奪奸凶之殘魄是又豈刻雕藻繪塗飾虛浮者之所
能及乎自三逆殄滅寰宇謚寧卹典頻加恩綸屢降固
已延賞後昆光賁泉壤矣茲特允其子時崇所請復為
序其存稿蓋善善欲長春秋之義弁章特錫數出非常

庶幾追妥忠魂亦以風厲臣節焉

張長庚

張長庚漢軍鑲黃旗人由秘書院編修順治八年
遷宏文院侍讀十年遷祕書院侍讀學士兼佐領
十一年遷國史院學士十二年充

殿試讀卷官十三年擢湖廣巡撫十四年疏報墾田
八千三百七十五頃下部議叙十五年十二月以
荊州安陸襄陽岳州等府水災請蠲免十六年春

復久雨成災荆安襄岳等府灾民流至武昌漢陽
長庚同巡按李廷松總督李廕祖倡議捐賑長庚
捐米千二百五十石錢三百二十五千下部議叙加
太子少保兵部尚書銜十七年四月授湖廣總督康
熙元年八月疏請裁駐岳州之上江防道從之湖
廣舊設巡撫二員又因川陝河南三省疆隅相接
設撫治一員科臣姚啟聖請援江南陝西之例分
湖北湖南兩巡撫

救長庠詳確定議長庠議以湖北之武昌漢陽黃州安陸
德安荊州襄陽鄖陽八府屬湖北巡撫轄以湖南
之長沙衡州永州寶慶辰州常德岳州七府柳靖
二州屬偏沅巡撫轄刑名錢穀各歸管理部議如
所請並裁鄖陽撫治缺

上允之二年長庠同靖西將軍穆里瑪定西將軍圖海等
擒斬明桂王將郝搖旗劉汝魁其黨李來亨竄伏
茅麓山官兵晝夜環攻來亨窮迫舉家焚燹長庠

招撫餘黨并以書招降桂王之荆國公王光興等
楚寇悉平下部察叙先是湖廣設左右布政使二
按察使一駐武昌三年三月移右布政司駐長沙
上以湖廣刑名事繁應增設按察使一其駐地令督撫議
奏長庚疏言增設臬司應照藩司例駐長沙專理
湖南長沙等七府及柳靖二州刑名十一月又言
房縣保康竹山竹溪興山巴東歸州一帶皆楚
省邊險地前逆寇盤據今已蕩平新開州縣宜設

兵資保障請酌撥荆彞鄖襄四鎮額兵駐防要地
俱奉

旨俞允四年五月疏給歸州巴東長陽興山房縣保康竹
溪竹山等八州縣流民間墾牛種部議行十月疏
報墾田六千頃有奇部議加一級六年四月

上諭查各省大小船按兵定數長庚疏言湖廣各營戰馬
礮船共四百七十五內除彞陵荊州城守襄陽均
房辰沅常岳等鎮協營戰馬礮船二百三十三應

全留外其提督與武昌城守宜都洞庭等標協營
戰馬礮船二百四十二內應裁六十二又內有督
提二標船三十三酌歸荊州武昌城守及漢陽守
備就近管理如所請行八年九月甄別各省督撫
奉

旨張長庚以原品隨旗行走十二年二月戶部以長庚前
捏報墾荒叅奏削太子少保銜十九年二月大兵
進剿雲貴

上以長庚於軍中著有能聲

命署副都統領兵赴之會川東賊譚洪復叛

命吏部郎中范承勳追趣長庚兼程赴夔陵擊賊十一月

洪犯夔州掠取糧艘

上以夔州乃運糧要地令長庚同護軍統領佟佳速取夔
州會洪死餘黨就戮川東平將軍趙良棟請酌撤
滿兵而以其半進取雲貴長庚在軍無功亦撤回
未幾卒

靳輔

靳輔漢軍鑲黃旗人父應選官通政使司叅議輔由官學生於順治九年考授國史院編修十五年改內閣中書尋遷兵部員外郎康熙元年遷郎中七年遷通政使司右通政明年擢國史院學士充纂修

世祖章皇帝實錄副總裁九年十月改內閣學士十年六月授安徽巡撫十一年四月奏臨淮靈璧二縣虛

報開墾田四千六百餘頃請

旨豁免田糧從之十三年逆藩吳三桂耿精忠分寇江西

煽誘饒州弁兵從逆

上詔輔增兵接壤防守輔尋遣兵會剿擒斬歙縣賊宋鑑
等十五年二月疏言戶兵二部因軍需浩繁令裁
驛站經費臣以為欲省經費宜先除糜費在外諸
臣非要務勿專差齎奏則火牌糜費節省十之八
京差官員酌量併減即解餉解礮沿途自有官兵

護送亦止需部差一員則勘合糜費節省十之三
嚴禁各員後橫索騷擾則節省無名之費更多安
徽所屬驛站額銀二十六萬兩有奇以十分之四
科之歲省十萬餘兩通天下計之每歲所節當不
下百餘萬可以裕軍餉甦驛困得

旨駢遞繁苦皆由差員橫索騷擾著嚴行飭禁下部詳議
如所奏定為例是年疏報存留各屬損脚等項銀
十一萬七千餘兩節省驛站銀十二萬九千餘兩

得

旨靳輔節省存留驛站各項錢糧為數甚多具見實心任
事下部議叙加兵部尚書銜十六年三月授河道總督
七月疏言黃河之水裹沙而行水合則流急而沙
隨水去水分則流緩沙停河底日高故全賴各處
清水併力助刷始能奔趨歸海而無滯歸仁一隄
原以障睢水及永堽卽家白鹿諸湖水不使侵淮
且令由小河口白洋河入黃刷沙自順治十六年

歸仁隄潰睢湖諸水侵淮不復入黃刷沙黃水從小河口白洋河二處逆灌積沙漸成陸地康熙六七年間王家營邢家口潰而黃水不由雲梯關入海古溝翟家壩潰而淮水不赴清口會黃十五年高家堰清水潭爛泥淺皆潰而運道益淤徐州以下黃流緩弱散漫而河底益高矣謹以大修事宜分別八疏一曰取土築隄使河寬深清江浦歷雲梯關至海口河身泥淤須於兩旁離水三大各

挑引河一道面濶八丈底濶二丈深一丈二尺即以掘取之土高築隄岸隄底七丈面濶三丈高一丈二尺則黃淮下注中央既有舊存一二十丈河身左右又各有八丈新鑿之河所存舊隄薄僅三丈一經三面夾攻自可盡行刷去新舊之河合而為一河身寬至四十丈深至二丈可以漸復舊觀其夫役請并令山東河南協募二曰開清口及爛泥淺引河使得引淮刷黃三曰加築高家堰隄岸

蓋欲堵決口不先修築殘隄恐水將尋隙奔潰而石工費甚浩繁板工不能耐久伏思水性至柔乘風則剛其板石諸工率皆陡峻故怒濤撞擊潰即隨之惟遇坦坡乃平漫而上順縮而下隄制水而不抗水雖經大水乘風高低不虞激潰今於隄外近湖之處挑土幫築坦坡每隄高一丈築坦坡五丈卽有舊存樁木亦聽其埋於土內以為隄骨分杵堅實密布草根草子於其上俟其茂長則土益

堅隄益固四曰周橋閘至翟家壩共三十二里原
衝支河九道及決口三十四處須次第堵塞臣驗
各處埽工率用柳枝蘆草費大而不能經久伏思
尅水者土也當求束土禦水之法改埽工為蒲包
裹土蒜繩捆紮而填之則費省而工亦堅固五曰
深挑清口至清水潭二百三十里運道所挑之土
俱傾於東西兩隄外即以幫築西隄坦坡增培東
隄堅厚六曰令淮揚田按上中下三則每畝納修

欽定四庫全書

卷一百九十

河銀三錢至二分有差商舡來往淮揚兩關納剥
淺銀一年以米豆每石二分貨物每斤四分為率
七曰裁南河中河北河通惠四分司就近歸道員
管理裁管河同知山清安海宿桃三缺改併山盱
歸仁邳宿三員以重責成八曰按里設兵畫隄分
守暇則栽柳蓄草添土幫隄每月乘濬船下鐵掃
帚刷河底淤沙督以員弁嚴立課程用期久遠疏
下王大臣議以軍務未竣大修募夫甚多宜暫停

上命輔熟籌輔申前奏惟運土用夫請改為車運遂皆如
所請

詔發帑興工輔乃開通清口爛泥淺引河四道濬清江浦
至雲梯關外河身創築束水隄一萬八千餘丈塞
于家岡武家墩高家堰諸決口河隄外加築縷隄
及格隄徐州宿遷築減水壩十三座其壩東西寬
十二丈南北長十八丈六尺中立礮心六座兩旁
俱用石牆土內密釘排椿灌以漿灰上鋪石板聯

以鉄錠每壩一座共成七洞每洞各寬一丈八尺計其洩水之地共十二丈六尺清水潭舊隄衝潰輔為棄深就淺計築西隄九百二十餘丈東隄六百餘丈更挑新河長八百四十丈奏改名永安河又以甘羅城西運口黃流內灌易致停淤自新莊閘西南挑濬至太平壩又自文華寺挑濬至七里閘復轉而西南亦接至太平壩因達爛泥淺去淮黃交會之地十里計閱兩月工竣先是漕船由駱

馬湖行八十餘里始抵密灣夏秋則盛漲冬春則水涸重運多阻輔於湖旁疏濬阜河故道上接洳河通運二十年三月以大修已越三年黃河未盡歸故道自請議處部議革職得

旨留任督修二十一年五月

上遣尚書伊桑阿侍郎宋文運等閱工並以候補布政使崔維雅隨往因其奏上河防芻議兩河治畧二書及條列二十四事欲改更輔所行減水埧諸法也

十月伊桑阿等還奏靳輔建議大修已用帑銀二百五十餘萬兩今蕭家渡決口未堵宿遷沭陽等處田地淹沒黃河不歸故道其言固難盡信崔維雅改議修築亦未必成功輔疏言河工次第告竣海口大闢下流疏通腹心之患已除蕭家渡決口堵塞亦易不宜有所更張因詳辯維雅陳二十四事不可行並下廷議工部尚書薩穆哈等請令輔賠修決口

上曰修治河工所需錢糧甚多靳輔果能賠修耶如必令賠修萬一貽誤漕運奈何朕思治淮尚易黃河身高於岸施工甚難崔維雅條奏二十四款朕初覽時似有可取及覽靳輔回奏崔維雅所奏誠無可行者因

召輔來京十一月輔至奏蕭家渡口明年正月可塞崔維雅所議挑河每日用夫四十萬築隄以十二丈為準斷不可行

上是之

特旨寬免賠修決口仍給帑堵築二十二年四月疏報蕭
家渡工成河歸故道請修七里溝險汛天妃壩王
公隄等閘座又請增開封歸德隄工以防上流壅
滯

諭曰河道關係國計民生最為緊要今聞河流得歸故道深
為可喜以後益宜嚴密勿致疎防十二月

詔復原職二十三年十月

上南巡閱河

諭輔曰朕觀高家堰地勢高於寶應高郵數倍前人於此築石隄障水實為淮揚屏蔽且使洪澤湖與淮水并力敵黃衝刷淤沙關係最重今高堰舊口及周橋翟壩修築雖久仍須歲歲防護不可輕視以隳前功

又

諭曰數年以來治河著有成效詎勉盡力朕已悉知此後當益加勉勵早告成功使百姓各安舊業庶不負朕委任至意因

御書閱河隄詩賜之二十四年正月疏請添建黃河南岸
毛城舖減水閘一王家山十八里屯減水閘三北
岸大谷山減水閘二以保徐州上流隄工並於歸
仁隄添建石壩二欄馬河及清河運口各添建石
閘一九月疏言勘閱河南隄岸考城儀封陽武三
縣應幫築隄工七千九百八十九丈封邱縣荊隆
口應築大月隄三百三十丈滎澤縣應修築埽工
二百一十丈以防上流異漲並請增設蘭陽儀封

榮澤河員免開封歸德二府居民採辦青柳事下
部議俱從之是時

上念高郵寶應諸州縣湖水泛溢民田被淹

命安徽按察使于成龍經理海口及下河事宜仍聽輔節

制輔疏言下河卑於海潮五尺疏海口則引潮內

侵大不便請自高郵城東車邏鎮築長隄二歷興

化白駒場至海口束所洩之水入海隄內涸出田

畝丈量還民其餘田招民屯墾以抵經費廷議如

所請

名輔及于成龍至京成龍力主開濬海口故道輔仍議築
長隄高一丈五尺束水敵海潮大學士九卿俱從
輔議通政使叅議成其範給事中王又旦御史錢
珏從成龍議時賢應人侍讀喬萊奏輔議非是乃
命尚書薩穆哈等勘視尋以開海口無益回奏會江寧巡
撫湯斌入為尚書奏下河宜濬

上命侍郎孫在豐往董其事二十六年七月

詔詢下河田疇何策可紓水患輔疏言宋元以前高郵寶應諸湖原皆田疇臣前堵築清水潭深挑兩隄中間河底有宋元舊錢及軌井石街其為民居可證蓋黃河在宋元時雖南侵而尚未全徙至明代始絕北流南奪淮渠以入海致淮水壅不得下清河縣之洪澤村漫漶而為洪澤湖又從高家堰翟家壩旁流東注為高郵寶應諸湖自此永不復田疇之舊且為患於下河矣臣屢經測驗運河隄項卑於

高堰隄頂一丈有奇故減水壩之建在堰隄可洩水一千方在運隄則使可洩水一千二百方所以歷七年之久三遭大漲而運隄安然無恙運隄所洩之水以下河為壑下河之東即大海濬海口似可紓水患然自清江浦南行三百餘里至江都縣之茱萸灣折而東百餘里至泰州又百餘里至海安鎮折而北即范公隄沿隄而行歷安豐東臺河垛丁溪白駒劉莊等場計二百餘里而抵鹽城縣

又北行百餘里而至廟灣場折而西百餘里為蘇
家嘴又百餘里仍回清江浦計程千里有奇惟廟
灣天妃石碇三口向係洩水入海之處必登舟過
渡餘皆可以馳馬之路其卑處於周圍馬路中者
南北三百餘里東西二百餘里形如釜底止就釜
底挑挖徒增釜底之深當淮流盛漲高堰洩水洶
湧而來仍不能救民田之淹沒臣與幕友陳潢反
覆曲籌杜患於流不若杜患於源高家堰之隄外

直東為下河東址為清口當自翟家壩起歷唐埂
古溝周橋閘高良澗高家堰築重隄一道約高一
丈七八尺至二丈不等長一萬六千丈需費七十
九萬五千兩此工一成東堰隄減下之水使北出
清口則洪澤湖之水不復東淦下河其下河十餘
萬頃之地可變成沃產而高寶諸湖俱可涸出田
畝數千頃招人屯墾可以裕河庫且高堰原為最
險之工增此隄則長年保護洪澤湖廣濶非常一

遇風起多覆舟沉溺行人此隄內之河則避湖險
而就安流有便於商民者甚大至臣幕友陳潢前
逢

聖駕閱工臣以姓名上達

宸聰其間興工之委曲及將來竣工非陳潢協力區畫不
可念臣垂老多病萬一卽填溝壑或病卧不能馳
驅則繼臣司河者仍必得陳潢在幕佐之庶不岐
誤此臣十年以來之血誠欲吐而未敢者今豫為

陳明非僅居功蔽賢之念不忍萌即引嫌避忌之私亦不敢計疏下廷議如所請並

賜陳潢僉事道銜時于成龍任直隸巡撫

詔以輔疏示詢成龍言下河宜開重隄不宜築

上遣尚書佛倫侍郎熊一瀟給事中達奇納趙吉士與總督董訥總漕慕天顏會勘天顏在豐議與輔相左佛倫等以應從輔請還奏仍下九卿會議二十七年正月御史郭琇疏言海宇昇平萬邦底定

宵旰殷憂時切如傷之念者止此一線黃河與淮揚等州
縣昏墊之黎民耳

皇上委任河臣靳輔靳輔則聽命於幕客陳潢如果洪水
歸洋狂瀾永息猶得有辭乃今日議築隄明日議
挑濬糜費帑金數百萬終無底止之期今日題河
道明日題河廳以

朝廷爵位為私恩從未聞有得人之效又復攘奪民
田妄稱屯墾橫取米麥越境貨賣

皇上以下河為必可開而靳輔百計阻撓欲令功垂成而終止且屯田一事

皇上洞知其累民會勘諸臣亦知其累民則靳輔陳潢之罪瞭如指掌矣陳潢為靳輔營一家之謀於

國計民生全無裨益忌功之念重圖利之心堅真國之蠹而民之讐也監司僉事何等尊貴豈容一介小人冒濫名器以快靳輔酬報私情宜即斥革

勅部嚴加處分另簡大臣之清廉敏練者整理河務庶成

功可奏生靈永利矣疏下九卿察議二月給事中
劉楷疏言河工道廳至雜職百十餘員題補之權
總歸河臣使其虛己求才果能奏安瀾之效猶且
不可久擅用人大權乃在在保舉及至任事漫無
寸功惟見每歲報衝決而已嗣後大小河官應仍
由吏部選補御史陸祖修疏言

皇上每遇緊要政事令九卿會議期於衆論僉同至當不
易無奈河臣靳輔身雖在外而呼吸甚靈九卿中

贊決異同者不過三四人皆左袒河臣不顧公議
如屯田一事悉依戶部尚書佛倫等所奏具稿箱
衆人之口伏思民間地畝各處例有准折起科並
無額外多餘之理直隸巡撫于成龍審事湖廣將
還倘蒙

親詢其間利病根由情弊始末可救東南七州縣昏墊之
民命省

內府幾百萬糜費之金錢河臣積惡已盈中外人心

總望

睿斷罷斥萬無議勞使過以重達回昔帝舜殛鯀以其逆
水之性也今兼有屯田害民之事去一斬輔天下
萬世仰頌

聖明無踰此矣時慕天顏孫在豐亦疏論屯田累民及輔
阻撓下河開濬事

詔俟于成龍至會議一併嚴察輔尋得請入

覲先疏論于成龍慕天顏孫在豐朋謀陷害又自辯受

命治河之日正當兩河壞極之時自碭山以抵海口南北
兩岸決口七八十處高家堰決口三十四處翟家
壩成河九道清水潭久潰下河七州縣一望汪洋
清口運河變為陸地臣晝夜奔馳先堵高家堰淮
水方出清口旋堵清水潭挑挖運河改移運口迄
今永遠深通其向來行運之駱馬湖淤淺不能行
舟臣創開阜河漕艘無阻久蒙

聖鑒至濬築經費方臣未任之初曾

特遣部臣履勘估計六百萬兩臣任事後苦心節省自徐州起直抵海口兩岸隄工并高家堰清水潭及前所未估之新開阜河堵塞楊家莊修築歸仁隄改移運口止用帑二百五十一萬兩又蕭家渡衝決時蒙

賜帑一百二十萬兩令一概加修竣工統計所用僅及前此部臣估計之半而臺臣郭琇則曰糜費帑金數百萬營一家之計不知何所見而誣臣至此極也

其曰題道題廳未聞得人則河員原因慎重河務必
由河臣保題定例已久非自臣始其曰奪田屯墾則
臣絕不以納糧之民田分釐入屯其曰越境賣麥
則臣原以變價還部題明其曰陳潢小人冒濫名
器則陳潢之蒙

恩實出鼓勵人才之

特典以言冒濫臣不知何所指且詆之為小人則固于成
龍久與結拜弟兄慕天顏頻與宴好殷勤孫在豐

亦與親密異常者也自康熙二十二年兩河歸故
運道通行而郭琇必以洪水狂瀾罪臣科臣劉楷
曰惟見每歲報衝決臺臣陸祖修曰逆水之性又
謂清丈隱佔非額外多餘地畝蓋郭琇與孫在豐
為庚戌科同年陸祖修為諸生時拜慕天顏為師
又係孫在豐教習門生劉楷陸祖修己未科同年
並江南人與隱佔田畝者無非桑梓親戚年譜之
契故彼呼此應協力陷臣慕天顏與孫在豐結婚

姻因于成龍倡開海口之議故必欲附成龍以攻
臣而助在豐兼奪臣任夫河臣之職與督撫不同
督撫統攝地方諸務稍一興利除弊易以見德河
臣頻年奔走河濱以挑築為務上費帑金下役民
力最易招尤致謗而臣之負謗更因屯田之清丈
隱佔隱佔地畝惟山陽最多有京田時田之分時
田一畝納一畝之糧係小民之業京田四畝納一
畝之糧皆勢豪之業臣清丈沭陽海州宿遷桃源

清河五屬得三百萬畝至山陽則終不能丈以山陽鄉紳多也臣不顧衆怒致讐謗沸騰使中傷臣者更得以藉口然臣任事十餘年凡雇夫挑築買辦物料皆給發現銀雖淮揚各屬隱佔田畝諸人怨臣至深者亦不能指摘也伏念河工一事成之甚難壞之甚易自康熙六年兩河潰決歷經數河臣治之十餘年終無一效臣受任之初羣議蜂起百計阻撓賴

皇上不惜帑金兼

授方畧而河得以復故正湏綢繆善後而諸臣合計交攻
必欲陷臣殺臣而後已全不顧運道民生大計當
此衆口鑠金之際即

皇上欲終始保全無如諸臣朋謀網陷之密布倘蒙
聖駕再巡

親閱隄工更

命重臣清丈隱佔地畝則臣與諸臣之是非功罪立分臣

身負重劾萬死一生幸得入

覲恐

天威咫尺不得盡吐所欲陳謹繕疏密奏疏入

上諭閣臣曰近因靳輔被劾議論其過者甚多靳輔若不
陳辯朕前復何所控告耶此疏並下九卿察議三月

上御乾清門

命輔與于成龍郭琇各陳所見于成龍言海口必應開濬
郭琇言屯田奪民產業

上曰屯田之事因取民餘田小民實皆嗟怨靳輔當亦無可置辯輔奏向者河旁田畝盡被水淹臣任事後將決口堵閉兩岸築隄河流故道無有衝決之患數年水淹之田盡皆涸出臣以民間原納租稅之額田給與本主其餘出之田作為屯田抵補河工所用錢糧因屬吏奉行不善民怨是實臣無可辯惟候處分

上曰各省民田未有不溢於納糧之額者若以餘田作屯

豈不大擾民乎屯田不行無可復議至下河作何開濬
重隄應否停築九卿等公同詳酌確議尋

允九卿議停築重隄革輔職以福建總督王新命代之陳
潢革僉事道銜初漕船出清口入黃河行二百里
始抵張莊運口輔奏於清河縣西仲家莊建閘上
自宿遷桃源清河三縣黃河北岸遙縷二隄內加
挑中河一道俾漕船既出清口截流徑渡北岸避
黃河一百八十里之險溜由仲家莊閘內進中河歷

阜河洳河北上及工竣學士開音布侍衛馬武往
勘還奏中河商賈舟行不絕漕運可通

上諭廷臣曰前于成龍奏云靳輔開中河無益反為民累
河道已大壞今聞音布等往勘則云數年以來河道未
嘗衝決漕艘亦未有誤謂靳輔治河無裨益微獨靳輔
不服朕亦不愜於心矣若王新命順從于成龍之說將
原修工程盡行更改是各懷私忿必致貽誤河工乃

命尚書張玉書圖納等往勘確議還奏河身漸次刷深黃

水迅溜入海其已建閘壩隄埽及已濬引河並應如輔所定章程無庸更改十一月輔奏

命同工部尚書蘇赫等往閱通州運河請於沙河建閘蓄水通州下流築隄束水以利漕運從之二十八年正月

上南巡閱河輔從行

諭詢中河逼近黃河水漲隄潰可虞輔奏前曾奉

諭籌攔馬河減水壩所出之水毋致淹沒民田臣聞中河

以束水兼令漕船避黃河險溜今若加築遙隄當不至有患三月

諭吏部曰朕南巡時江南淮安人民皆稱譽前任河道總督靳輔思念不忘且見靳輔濬河深通築隄堅固實心任事勞績昭然可復其原品二十九年三月漕運總督董納以北運河水淺請盡洩南旺湖之水北流倉場侍郎凱音布以挑濬北運河奏請

上召問輔輔奏南旺湖水若使偏入北河必致南河水淺

惟從北河兩旁下埽束水則水深自可濟運

詔即以輔同凱音布經理之三十年九月奉

命與侍郎博霽李光地等閱黃河險工三十一年正月還

奏黃河南岸自徐州以上毛城鋪起至海口北岸

自大谷山起至雲梯關以下六套所有減水閘壩

現無衝損中河亦甚便漕船往來惟黃河南岸之

楊橫莊煙墩馬邏北岸之朱家莊安東縣便益門

南東門六處險工有未設月隄及下埽單薄處應

增築加培並繪圖呈

覽下九卿議令河臣如所奏行二月王新命以勒取庫銀
為運河同知陳良謨訐罷

上諭大學士曰朕聽政以來以三藩及河務漕運為三大
事夙夜屢念曾書而懸之宮中柱上至今尚存倘河務
不得其人一時漕運有誤闕係匪輕靳輔熟練河務及
其未甚老而用之亦得紆數年之慮其仍令為河道總
督輔以衰病辭

命順天府丞徐廷璽同往協理六月疏言前奉

詔截留江北漕糧二十萬石由黃河運至山西蒲州撥陝西賑濟臣因開封以西黃河深淺無定與漕臣董訥定議漕船三百八十四每船豫支下運行月銀六十兩為增雇剥船夫役之用共銀二萬三千四百十兩二月初自淮安開行臣於五月初赴開封督飭催僱添雇民船隨淺隨剥撫臣閻興邦牒稱水路止可運至孟津由孟津陸運至蒲州六百三十

里業經山陝兩省議明分運臣今赴孟津料理得
旨嘉其實心任事十月疏言黃河自河南滎澤縣至江

南清河縣兩岸各一千餘里其險工不可踈虞如南
岸之在開封或疏虞則黃水入淮歸德至宿遷或
疏虞則黃水入睢桃源清河間或疏虞則黃水入
洪澤湖以侵高堰倘高堰不固寶應高郵運道必
致淤墊故尚須籌畫萬全欲加築前此停築之重
隄為費甚大惟就運料小河之隄加築高二大廣

三丈乃可無患。北岸之在榮澤或疎虞則黃水上
溢。張秋下溢濟寧魚臺豐沛民田受淹。宿遷清河
或疎虞則一八十里之運道亦淤墊。故中河遙隄
必須加築於西寧橋。添建石閘二。仲家莊陶家莊
兩閘左右各添一閘以備宣洩。其張莊舊運口臣
輔前挑中河時曾議設閘。因解任未舉行。恐將
來山東之水微弱至中河淺澁。今宜竟行堵塞。就
駱馬湖之東中河之南建閘。值東水大長開以洩。

之東水消落閉以蓄之庶無他慮又疏言黃河隄
工莫重於既成之後隨時修補隄根積水易致汕
刷惟於上流量挖一溝引沙直注使停再於下流
量挖一溝引水分洩漸去其低窪處自然淤平臣
輔前任時相度董家堂龍窩二處險工曾設涵洞
引黃灌注於月隄裏使清流在月隄外窪地遂成
平陸徐州長樊大壩險工亦引黃內灌淤高窪地
二三尺今邳州舊城迤西窪地周圍約有百里

水無去路宜倣已驗之法行之或慮掘隄難以修防
則建小閘以酌量引灌更為萬全疏下九卿議以
黃河水勢湍迅引灌邳州窪地似屬危險令再審
籌餘如所請行又疏言臣前任安徽巡撫當軍興
之際陳潢助理協宜及任總河值高家堰決口甚
多翟家壩未堵二十餘里成河九道因盡行築隄塞
河以敵清口之黃創設減水壩以保高堰之隄改
清水潭隄工於湖內永保安瀾濬甘羅城運口至

太平壩以避黃水內灌挑阜河二十餘里支河三十里使駱馬湖不復淤墊又挑中河使漕船免黃河逆流之險凡臣所經營皆潢之計議仰荷

聖主如天之福次第成功

恩授潢僉事道銜不意驟遭詆毀革去職銜旋即物故又

奉

命勘河之尚書熊一瀟給事中達奇納趙吉士同時被指

摘而去今臣已蒙

恩起復則無辜受累者當一體均邀

慈鑒疏下吏部陳潢已故寢議熊一瀟達奇納趙吉士並

請

旨錄用時輔再疏自陳疾劇乞解任

命內大臣明珠往視傳

諭留淮調理十一月卒於官年六十遺疏至得

旨靳輔簡督河務經理年久黃淮兩河修築得宜運道民

生俱有裨益患病溘逝深軫朕懷下部議卹

賜祭葬謚曰文襄三十五年河道總督董安國以江南士民

籲請捐資建祠河干入奏下部議行四十六年

上南巡還

諭吏部曰朕屢念河防屢行親閱凡自昔河道之源流治河之得失按圖考績靡不周知粵從明季寇氛決黃灌汴而洪流橫溢歲久不治迄於本朝在河諸臣未能殫心修築以致康熙十四五年間黃淮交敵海口漸淤朕乃特命靳輔為河道總督靳輔自受事以後斟酌時宜

相度形勢興建隄壩廣疏引河排衆議而不撓竭精勤以自効於是淮黃故道次第修復而糟運大通其一切經理之法具在雖嗣後河臣互有損益而規模措置不能易也至於創開中河避黃河一百八十里波濤之險因而漕輓安流商民利濟其有功於運道民生至大且遠朕每莅河干徧加諮訪沿淮居民感頌靳輔治績衆口如一久而不衰夫人臣有大建樹於國家者獎勲酬庸宜從優渥雖賜卹易名已循彝典尚應特與褒叙賁

以殊恩其加贈太子太保予騎都尉世職用彰朝廷追美勞臣之典為矢忠宣力者勸尋令其子治豫襲職准

再襲二次

世宗憲皇帝雍正三年以治豫向隨父任明晰河務由副

叅領加工部侍郎銜協理江南河工事務五年

諭閣臣曰朕覽治河方畧見原任河道總督靳輔昔年修理河工勞績茂著欲加恩澤以獎勲庸據吏部查奏康熙四十六年已贈官保與世職今再追贈工部尚書予

祭一次以示朕篤念前勞至意七年

命江蘇巡撫尹繼善擇地建祠祀輔及河道總督齊蘇勒

有司春秋致祭八年

詔建賢良祠於京師以輔入祀



欽定八旗通志卷一百九十